



## 阿章伯个魚塘

阿章伯个伙房屋頭前有一窟大魚塘，逐日臨暗邊，佢斯會割兜莖草、豬菜抑係杯兜菜蓋，擲入魚塘肚分魚食。若企在魚塘脣斯看得著草魚浮起來絡食，一尾一尾烏疏疏个大草魚，粉粉還合紅牙紅牙个魚嘴，一開一合、一開一合緊擊、緊呷，水面弄出一圈一圈个水紋，還合一粒一粒个水波，又好看又生趣。

成半下，阿章伯屋家有人客來，佢斯會去魚塘攔草魚，煮豐沛做桌心來請人客。逐擺阿章伯愛用魚網攔魚个時節，斯會錫來歸陣細亞在魚塘脣圍圍擊，等核看大魚。阿章伯手腳伶俐，一下斯同魚網掖落魚塘，像一蕊散開个花，魚網下背有鉛墜，同網墜落魚塘底。等有一下，阿章伯斯慢慢收網，網䟽來个大草魚一出水面，在撈揮(fe+)肚緊奮緊跳，日頭照著該魚肚个魚鱗金哲哲當靚，歸陣細亞斯暢去哇哇滾緊拍手，歡喜都毋輸像等下該尾魚愛上厥食飯桌个樣。

雖然逐個細人做下當好去阿章伯个魚塘搞寮，毋過為著安全，阿章伯个魚塘迂迂沿脣有圍核一公尺高个鐵線網，間(gam`)一、兩公尺斯有一支樹樁撐核，留有一扇門好出入。該門平常時也做下會鎖核，半晝半暗，輒輒會有細人隔核鐵線網抑幾皮菜葉抑係草葉入去，目金金看菜葉跌落魚塘肚，想愛錫魚塘肚个魚出來。若看著魚泅過來食菜葉，細人斯會歡喜去緊跳。

其實，頭擺阿章伯个魚塘無圍鐵線網，該魚塘水係對山坑探過來个，坑肚个細魚崽、細蝦公長在會跔水覓水流過來。魚塘得入毋得出，這兜蝦公、魚崽若無分大魚食撇，斯會在魚塘肚生活，變做大蝦公、大尾魚咧。該下个細人使得撈兜蟲蟪，坐在魚塘脣釣魚，雖然釣毋著大草魚、大鯉嘛，毋過，撈(sio`)幾尾白哥、石鱖、蝦公也當歡喜，阿章伯个魚塘斯係細亞嚟放寮日盡好去搞寮个位所。

毋過，有一年暑假，阿章伯九歲个細漢俵阿宏同莊肚个細人共下在魚塘脣釣魚。毋知係仰脣，阿宏該日運氣十分好，釣槓一晃(hainn`)出去，跔核斯釣著魚，別個細人眼呆呆緊看，欽羨都奈毋得。阿宏運氣旺心肝斯大，想講愛釣過較大尾个魚，將四五尾蟲蟪勾勾共下，做一到晃落魚塘肚，無幾久，釣槓彎彎彎當重拉，釣線擲去緬緬還緊掙，正經有大魚著釣咧！阿宏暢壞俵咧，出力胚命拉核釣槓，毋過，該魚个力頭當大，阿宏擲佢毋贏，又毋肯放手，一下斯分大魚拖落魚塘。阿宏在魚塘肚一下浮一下沉，連喊救命都喊毋出，該兜細人伴遽遽走去喊大人來救佢，好得，阿宏龍大尾，分大人揪䟽來，除撇嚇去面瀝青並食歸肚尿个水，其他無礙著。

第二日，阿章伯姆講愛同魚塘屯撇，阿章伯姆肯，喊人揸手用鐵線網同魚塘圍起來。對該擺過，阿章伯个魚塘斯無過放分細人去釣魚咧！阿宏也因致該擺「分魚釣去」个經驗，直直到二十零歲還當驚水，毋敢落水學泅身，也毋識過去釣魚咧！

作者：徐姿華

### ☆詞彙學習☆

【水波】shui` po+：水泡。

【迂迂沿脣】din+ din+ rhen` shun`：圍繞著物體外圍。

【白哥】pag` go+：溪哥。

【石鱖】shag` bien+：石鱖魚。

【眼呆呆】ngien` ngoi` ngoi`：專注的看著。

【緊掙】gin` dui`：一直用力往下扯。

【暢壞俵】tiong` fai` lai`：開心極了。

【龍大尾】liung` tai` mui+：福星高照，運氣很好。通常用在避開危險之時。

【面瀝青】mien` lag` ciang+：因為驚嚇而臉色發白泛青。